

ADITYAYA I

PURWAKA

1.1 Dadalan Pikobet

Pendidikan pinaka dasar sane patut kapoliang olih samian jadma. Pendidikan sane utama punika pikoliang iraga ring dewek, ring kaluwarga, ring krama, punika taler ring sekolah. Pendidikan kaicen saking dewek kantun cerik ngantos kelih. Tetujon pendidikan mangda prasida dados jadma sane mawiguna. Ring sajeroning punika, pendidikan dadosnyane nyingakin nabi sane luwih, sane nenten luh sane pacang kasobyang ring jadma makasami. Punika taler, pendidikan kaaptiang prasida ngawetuang lan ngelimbakang karakter wangsa.

Kawentenan pendidikan ring sekolah kaaptiang mangda sisia prasida ngeresepang sakancan peplajahan sane kaicen olih guru. Majeng ring guru mangda nganutin kurikulum sane wenten sampun kasobyahang olih pamerintah, saantukan kurikulum pinaka pedoman ngelaksanayang proses peplajahan. Guru nenten je nelatarang indik bebaosan kementan, nanging sisia patut *aktif* ri kala nyarengin peplajahan. Peplajahan ring kelas guru sumangdane kreatif mangda sisia nenden kimud malajah ring kelas. Akeh sisia sane sane seneng melajah, nanging wenten sisia sane nenten seneng melajah. Punika wenten sisia sane sukil ngeresepang peplajahan, sisia sane kimud, miwah sane lianan. Wenten taler sisia sane nenten urati tekening peplajahan sane sampun kaicen olih guru. Ring sajeroning peplajahan basa Bali wenten makudang soroh kawagedan sane patut

antuk kaplajahin olih sisia. Minakadi kawagedan miarsayang, kawagedan ngwacen, kawagedan nyurat, taler kawagedan mabebaosan. Melajah basa Bali kaaptiang mangda sisia samian prasida waged ring makasami kawagedan punika mangda wenten kawigunannyane ring kahuripan. Maosang indik punika, wenten sisia sane nenten waged ring makasami kawagedan punika. Sisia karasayang meweh melajahin punika, taler guru nenten samian prasida ngicen peplajahan. Punika kaaptiang mangda sisia lan guru prasida pateh nglaksanayang peplajahan sane kreatif. Yening guru sampun prasida ngicen peplajahan sane menarik pastika sisia seneng melajah ring kelas. Panilik taler nyingakin kantun akeh guru sane dereng nganggen media peplajahan rikala ngemargiang peplajahan ring kelas. Guru sepatutnyane madue kawagedan ri kala ngerencanaang, lan nglaksanayang peplajahan ring sekolah, mangda anut ring tetujon peplajahan. Punika taler guru patut nyingakin sapunapi pikenoh sane prasida kapolihang saking media utawi sarana rikala nglaksanayang peplajahan ring kelas.

Majalaran antuk punika, kawentenan grubug sekadi mangkin sane kawastanin *Pandemi Covid 19*. Virus corona punika wit saking Provinsi Wuhan, Tiongkok, tur virus punika mangkin sampun keni ring samian negara. Virus corona ngawinang para jadmane sungkan, taler ngemasin mati. Sungkane punika sekadi *Middle East Respiratory Syndrome (MERS)* lan *Severe Acute Respiratory Syndrome (SARS)* (Kementrian Kesehatan, 2020)

Kawentenan Virus Corona punika ngawinang makasami jadma ring gumine nenten dados nyalanang pakaryane ring margine, punika taler majeng ring para sisia lan guru nenten dados ngamargiang peplajahan ring sekolah. Sane ngamargiang peplajahan ring sekolah, mangkin ngamargiang peplajahan ring

griya soang-soang. Yadiastun peplajahane kamargiang ring griya soang-soang, sisia kaaptiang mangda ngresep peplajahan sane kaicen olih guru. Punika taler guru kaaptiang mangda setata ngicenin para sisia peplajahan sane anut tur becik. Majalaran antuk punika, ring kawentenan viruse sekadi mangkin, sisia lan guru mangda stata ngemargiang peplajahan.

Melajah basa Bali punika akeh wenten materinyane silih tunggil materi paribasa Bali. Materi puniki sisia kaaptiang mangda nguratiang, ngapalang, taler mengarang kruna-kruna sane patut yening makarya lengkara indik paribasa. Yening kacingak paribasa puniki mapaketan sareng kahuripan iraga ring gumi. Paribasa Bali punika kaangen ngalengutan basa mangda anake sane mireng punika seneng. Nanging yening iraga nenten becik ngaryanin punika sinah nenten mapaketan sareng napi sane kakayunan. Peplajahan Paribasa Bali ring kelas ngawinang sisiane meweh melajahin puniki. Santukan materi puniki akeh sorohnyane lan meweh antuk ngingetang. Nanging melajah punika nenten ja ngapalang kemanten nanging sepatutnya uning teken tegesnyane. Yening peplajahan punika kadagingin antuk gegendingan pastike alit-alit e demen nyarengin peplajahan punika. Sumangdane peplajahan punika nenten keweh, punika dagingin antuk media-media sane patut kaangen ring sajeroning peplajahan punika.

Malarapan antuk punika. panilik ngalaksanayang observasi ring sekolah taler guru basa Bali ring SMP Negeri 1 Tabanan. Guru nyobyahang sisia kelas VIIIE ring SMP Negeri 1 Tabanan kari meweh melajahin basa Bali napi malih mangkin melajah ring griya soang-soang, guru ten prasida nyingakin kawagedan sisia ri kala melajah utamannyane intik materi paribasa Bali. Guru nikaang materi

niki meweh katerima olih sisia santukan peplajahan niki ngemedin taler akeh sorohnyane. Punika taler guru kari meweh ngerancang peplajahan mangda peplajahan niki nenten meweh katerima olih sisia. Panilik taler nyingakin peplajahan ring guru durung nganggen media sane kreatif, nika sane karasayang meweh olih sisia. Yening kacingakin peplajahan paribasa Bali punika akeh nyaritayang indik jadm, baburon, taler kahuripan sane wenten ring gumine. Sepatutnyane sisia lan guru prasida *mengkaitkan* peplajahan paribasa Bali sareng kahuripan. Mawinan asapunika guru lan sisia kaaptiang mangda prasida ngamargiang materi paribasa Bali puniki kalaksanayang sane becik. *Media audio visual* sane marupa *video* utawi *film* madue kawigunan anggen ngwantu nyingakin sisia rikala melajah maparibasa Bali nganggen sarana gending *pop* Bali (Arsyad, 2012: 148). Punika taler panilik nyingakin alit-alit mangkin seneng mirengang gegendingan. Alit-alit kari SMP pastika seneng teken gegendingan napi malih gegendingan sane gelis paobahane. Gending - gending punika minakadi *pop*, *jazz*, miwah sane lianan. Gending punika nenten ja meweh antuk uning teken teges liriknyane. Biasanyane wenten sane medaging babanyolan, sasiptan, miwah sane lianan. Napi malih gending punika biasane mapaketan sareng kahuripan. Yening peplajahan punika kasarengin antuk gegendingan, pastika alit-alite demen nyarengin peplajahan.

Tetilikan sane ngganggan *media audio visual* antuk gending *pop* Bali nenten tetilikan sane kapertama. Daweng sane sampun lintang, sampun wenten penilik sane nilikin nganggen gending *pop* Bali ring Paribasa Bali inggih punika tetilikan saking Ni Putu Rustiana Dewi (2017) tetilikannyane mamurda *Pemertahanan Kearifan Lokal Basita Paribasa Bali ring Tembang Pop Bali*

(Pupulan Tembang *Hits* Saking Dek Ulik). Tetilikannyane punika marupa kawentenan Basita Paribasa ring sajeroning tembang *pop* Bali. Tetilikan sane kaping kalih inggih punika tetilikan saking Luh Putu Novyta Handayani (2016) tetilikannyane mamurda Kawigunan *Media audio visual* Marupa Gending Pop Bali ring Peplajahan Nyurat Cerpen Basa Bali Maaksara Latin sisia kelas X Multimedia 2 SMK Negeri 1 Sukasada. Tetilikan sane kaping tiga sane nganggen *media audio visual* inggih punika Ni Made Rispintari (2019) sane mamurda Ngawigunayang *Media audio visual* Kaangen Nincapang kawagedan Matembang Pupuh Ginada Sisia Kelas X IBB 1 SMA Negeri 3 Singaraja. Pikolih tetilikan ring ajeng saking makakalih punika, dadosnyane sisia seneng melajah nganggen *media audio visual*. Punika taler sisia prasida nglimbakang melajah bahasa Bali nganggen *media audio visual*. Majalaran antuk punika, panilik jagi nilikin malih nganggen *media audio visual* antuk gending *pop* Bali.

Media audio visual antuk gending *pop* Bali punika becik kanggen ring ngamargiang peplajahan paribasa Bali, saantukan yening mirengan gending *pop* Bali sisia pastika marasa seneng ri kala nyarengin peplajahan ring kelas. Lianan ring punika, *media audio visual* antuk gending *pop* Bali prasida nincapang kaweruhan ring sisia indik parindikan sane wenten ring kahuripan. Manut Hamalik (sajeroning Arsyad 2017:19) nguningayang yening nganggen media peplajahan ring kelas, sisia prasida sayan ngeresep tur ngelimbakang antuk *psikologis* sisia. Nganggen *media audio visual* puniki sisia prasida ngeresepang nabi sane kapireng lan kacingak ring gending *pop* Bali. Nganggen media puniki ring peplajahan daring sekadi mangkin, sisia prasida mirengang sambilang melajah nganggen piranti peplajahan.

Madasar antuk dadalan pikobet sane kapolihang olih panilik, panilik jagi ngicen indik media peplajahan *media audio visual* antuk gending *pop* Bali marupa *video* sane prasida nincapang kawagedan sisia maparibasa Bali lan prasida ngicenin paiketan pantaraning daging peplajahan sareng kauripan sarahina sisia kelas VIII SMP Negeri 1 Tabanan warsa 2021. Kacutetang panilik ngalaksanayang tetilikan sane mamurda "*Media audio visual* Kaangen Nincapang Kawagedan Paribasa Bali ring Lagu *Pop* Bali Sisia Kelas VIII SMP Negeri 1 Tabanan warsa 2021". Panilik ngaptiang, kawentenan media ring sajeroning tetilikan puniki sisia prasida sayan waged melajah ring kelas utamanyane ring peplajahan paribasa Bali. Napi malih nganggen media sane menarik tur kasarengin antuk lagu *pop* Bali, sisia kaaptiang seneng melajah paribasa Bali. Yadiastun kawenten virus corona sekadi mangkin, sisia kaaptiang mangda setata melajah. Melajah sambalang mirengang gegendingan ring griya soang-soang, sisia pastika seneng nyarengin peplajahan. Kacingak sisia-sisia makasami demen teken gegendingan, prasida nenten meweh antuk ngajahin. Antuk punika, kacutetang pangawigunaan sane sampun katlatarang mawiguna ring sajeroning peplajahan. Kaaptiang sareng panilik piniki peplajahan paribasa Bali ring sisia kelas VIII SMP Negeri 1 Tabanan prasida ngamolihang tetilik sane becik tur sisia waged maparibasa Bali.

1.2 Ngrerih Pikobet

Manut dadalan pikobet sane sampun katlatarang, ring sajeroning tetilikan puniki sane jagi kalaksanayang panilik ngrerih makudang-kudang pikobet sane sampun katlatarang. Pikobet sane prasida karereh mangda mapaiketan sareng peplajahan paribasa Bali malarapan antuk ngawigunayang *media audio visual* .

Pikobet punika ngenenin indik paribasa Bali sane meweh antuk ngeresep ring sajeroning peplajahan paribasa Bali ring kelas. Pikobet sane kapanggih minakadi : (1) Sisia kari meweh melajain lan ngelingang indik kawenten paribasa Bali ring materi punika, dadosnyane pelajaran paribasa Bali punika sisia sue ngaresep peplajahane punika. (2) Guru dereng nganggen media pembelajaran sane *menarik* mangda sisia nenten kimud nyarengin peplajahanyane, (3) Peplajahan basa Bali sane akeh materinyane ngranayang sisia kimud melajah. (4) Peplajahan paribasa Bali kari meweh antuk sisia ngeresepang. (5) Nilai sisia indik materi paribasa Bali kanton cenik.

1.3 Ngwatesin Pikobet

Ring sajeroning tetilikan sane jagi kalaksanayang, panilik nureksain malih pikobet sane sampun karereh. Pikobet punika kawatesin antuk makudang-kudang parindikan minakadi kabanda antuk galah lan ngicenin peluang majeng ring panilik siosan mangda nyangkepin saha ngemargiang tetilikan manut kaweruhaan widya sane lianan. Malarapan antuk punika, tetilikan puniki ngawatesin wantah ring *media audio visual* kaangen nincapang kawagedan paribasa Bali antuk gending *pop* Bali sisia kelas VIII SMP Negeri 1 Tabanan warsa 2021.

1.4 Bantang Pikobet

Manut dadalan pikobet sane sampun katlatarang, sane bantang pikobet sane prasida kapolihang inggih punika:

- 1) Sapunapi pamargin *media audio visual* kaangen nincapang kawagedan paribasa Bali antuk gending *pop* Bali sisia kelas VIIIIE SMP Negeri 1 Tabanan warsa 2021?
- 2) Napikah *media audio visual* prasida kaangen nincapang kawagedan paribasa Bali antuk gending *pop* Bali sisia kelas VIIIIE SMP Negeri 1 Tabanan warsa 2021?
- 3) Sapunapi panampen sisia kelas VIIIIE SMP Negeri 1 Tabanan ring kawentenan *media audio visual* antuk gending *pop* Bali kaangen nincapang kawagedan maparibasa Bali?

1.5 Tetujon Tetilik

Manut bantang pikobet sane sampun katatang, tatujon tetilikan puniki inggih punika:

- 1) Mangda uning sapunapi pamargin sane kaangen ri tatkala ngawentenang *media audio visual* kaangen nincapang kawagedan paribasa Bali antuk gending *pop* Bali sisia kelas VIIIIE SMP Negeri 1 Tabanan
- 2) Mangda uning napikah *media audio visual* prasida kaangen nincapang kawagedan paribasa Bali antuk gending *pop* Bali sisia kelas VIIIIE SMP Negeri 1 Tabanan
- 3) Mangda uning sapunapi panampen sisia kelas VIIIIE SMP Negeri 1 Tabanan ring kawentenan *media audio visual* antuk gending *pop* Bali kaangen nincapang kawagedan paribasa Bali.

1.6 Kawigunan Tetilik

Ring sajeroning tetilikan puniki wenten kawigunannyane, kawigunan punika minakadi kawigunan pamucuk miwah kawigunan panglimbak minakadi: